

JOIBE SANTE «in Cena Domini»

Antifone di jentrade cf. Ga 6,14

Che no nus capiti mai di vantâsi di alc
che no sedi la crôs di nestri Signôr Jesù Crist,
lui al è la salvece, la vite e la resurezion;
midiant di lui o sin stâts salvâts e liberâts.

Si dñs Glorie a Diu.

Colete

Diu, che tu nus âs dâts dongje par fâ memorie
de Cene une vore sante cuant che to Fi, prin di consegnâsi a la muart,
al à volût lassâi a la Glesie il gnûf sacrifici de aleance eterne
e il past nuviçâl dal so bonvolê,
fâs, ti preìn, che di un misteri cussì grant
o podìn urî la plenece de caritât e de vite.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Es 12,1-8.11-14

Prescrizions pe cene de Pasche.

Dal libri dal Esodo

In chei dñs, il Signôr i disè a Mosè e a Aron in Egjit: «Chest mê s al sarà par vualtris il prin di ducj i mê s dal an. Feveliur a dute la int di Israel e disiur cussì: Ai dñs di chest mê s, ognidun che si proviodi un cjâf di besteam minût par famee, un cjâf di besteam minût par cjase. Se la famee e je masse piçule par un nemâl dal trop, si metarà cun chel che al è a stâ plui dongje, seont il numar des bocjis. O sielzarês un nemâl dal trop daûr che ognidun al pues mangjânt. Il nemâl dal trop al sarà un mascjo, cence nissune pecje, di un an. Lu sielzarês framieç dai rocs o des cjavris. O vês di tignîlu fin ai cutuardis di chest mê s, e dute la semblee dal popul di Israel lu sacrificarà sul lâ a mont dal soreli. O cjolarês une zumiele dal so sanc e lu metarês su lis dôs antis e sul frontâl des cjasis là che lu mangjarês. Ta chê stesse gnot si mangjarà la cjar rustide sul fûc; si le mangjarà cul pan cence levan e cun jerbis maris. O vês di mangjâlu cussì: cu la cinturie sui ombui, i sandui tai pîts e il baston in man. Lu mangjarês in premure: e je la Pasche dal Signôr. Ta chê stesse gnot jo o passarai par dut l'Egjit e o fruçarai ducj i prins nassûts de tiere dal Egjit, oms e nemâi, e o fasarai sentence di ducj i dius dal Egjit, jo, il Signôr. Il sanc al sarà par vualtris un segnâl su lis cjasis là che o sês a stâ. Viodint chest segnâl, jo o passarai dret e vualtris no us sfiljarà il flagjel de distruzion cuant che o vuaiarai l'Egjit. Chê di vualtris le tignarês simpri in memorie e o fasarês fieste pal Signôr; le ricuardarês di ete in ete. Al è un decret par simpri».

Peraule di Diu.

SALM RESPONSORIÂL dal Salm 115

R. Il to cjalîç, Signôr, al è un regâl di salvece.

Cemût fasaiaio a paiâ il Signôr
di dut il ben che mi à fat lui?

O alçarai il cjalîç de salvece
e o clamarai il non dal Signôr. **R.**

E je cetant preseade pai vôi dal Signôr
la muart dai siei amîs.

E jo, Signôr, o soi un to famei,

to famei e fi de tô sierve.
Tu tu âs crevadis lis mês cjadenis. **R.**

Un sacrifici di laut ti ufrissarai
e o clamarai il non dal Signôr.
O sodisfasarai ducj i miei avôts cul Signôr
in face di dut il so popul. **R.**

SECONDE LETURE 1 Cor 11,23-26

Ogni volte che vualtris o mangjais chest pan e o bevês chest cjaliç, o contais la muart dal Signôr.

De prime letare di san Pauli apuestul ai Corints

Fradis, jo o ài vût dal Signôr ce che us ài consegnât: che il Signôr Jesù, te gnot che lu àn tradît, al à cjapât sù il pan, e, fat il ringraciament, lu à crevât e al à dit: «Chest al è il gno cuarp, che al è par vualtris; fasêt cussì in memorie di me». Te stesse maniere, dopo di vê cenât, al à cjapât sù ancje il cjaliç disint: «Chest cjaliç al è la gnove aleance tal gno sanc; fasêt cussì, ogni volte che int bevarês, in memorie di me». Sigheduncje ogni volte che vualtris o mangjais chest pan e o bevês chest cjaliç, o contais la muart dal Signôr, fin che nol torne.

Peraule di Diu.

CJANT AL VANZELI cf. Zn 13,34

R. Glorie e laut a ti, Crist Signôr!

Us doi un comandament gnûf, al dîs il Signôr:

che si voledis ben un cul altri;

come che ancje jo us ài volût ben a vualtris.

R. Glorie e laut a ti, Crist Signôr!

VANZELI Zn 13,1-15

Ur volè ben fint al colm.

Dal vanzeli seont Zuan

Prime de fieste di Pasche, savint Jesù che e jere rivade la sô ore di passâ di chest mont li dal Pari, dopo di vêur volût ben ai siei che a jerin in chest mont, ur volè ben fin al colm. E intant de cene, cuant che il diaul i veve za metût tal cûr a Jude di Simon Iscariot di tradîlu, savint che il Pari i veve metût dut tes sôs mans e che al jere saltât fûr di Diu e al tornave a Diu, al jeve sù de taule, al gjave il mantiel e, cjolt un suieman, sal peà tor de vite. Po al strucje aghe intun cjadin e al tacà a lavâ i pîts dai siei disepui e a suiâju cul suieman che al veve tor de vite. Al rive duncje li di Simon Pieri. I dîs: «Signôr, tu tu mi lavis i pîts a mi?». I rispuindè Jesù: «Ce che o fâs, tu cumò no tu lu capissis; tu lu capissarâs plui indenant». I dîs Pieri: «Tu no tu mi lavarâs i pîts. Mai plui e mai altri». I rispuindè Jesù: «Se no ti lavi, no tu varâs part cun me». I dîs Simon Pieri: «Signôr, no dome i miei pîts, ma ancje lis mans e il cjâf». I dîs Jesù: «Chel che al à fat il bagn, al baste che si lavi i pîts, che al è za dut mont; ancje vualtris o sês monts, ma no ducj». Di fat al saveve cui che al stave par tradîlu, par chest al disè: «No sês ducj monts».

Finît duncje di lavâur i pîts, al tornà a cjoli il so mantiel, si sentà e ur disè: «Capîso ce che us ài fat? Vualtris mi clamais mestri e Signôr e o disês ben, parcè che lu soi. Poben, se jo, il Signôr e il mestri, us ài lavâts i pîts, ancje vualtris o vês di lavâsi i pîts un cul altri. Di fat us ài dât l'esempli par che ancje vualtris o fasês come che jo us ài fat a vualtris».

Peraule dal Signôr.

Su lis ufiertis

Danus la grazie, Signôr,

di celebrâ chescj misteris dispès e cun fede,

parcè che ogni volte che si fâs memorie di chest sacrifici

si colme la vore de nestre redenzie.

Par Crist nestri Signôr.

Antifone a la comunion 1 Cor 11,24-25

Chest al è il gno Cuarp, che al è par vualtris;
chest cjaliç al è la gnove aleance tal gno Sanc,
al dîs il Signôr.

Fasêt chest, ogni volte che int bevarês,
in memorie di me.

Daspò de comunion

Danus la gracie, Diu onipotent,
che come che si sostentìn a la Cene di to Fi in cheste vite,
cussì o mertìn di jessi saciâts inte Cene eterne.

Par Crist nestri Signôr.